

## **ANTEPROXECTO DE LEI DE MODIFICACIÓN DA LEI 11/2008, DO 3 DE DECEMBRO, DE PESCA DE GALICIA.**

### **Preámbulo**

A pesca galega ten amosado un compoñente de iniciativa e vontade de expansión que marcou sempre o seu desenvolvemento. Tanto na propia actividade extractiva, na acuicultura ou no eido transformador, o sector pesqueiro é un referente, non só en España senón tamén en Europa, pola súa fortaleza e o seu espírito emprendedor.

De hai un tempo, a súa tradicional puxanza veuse minguada polas circunstancias ás que se atopa sometida esta actividade, o que fai que o sector pesqueiro, que integra unha gran estrutura laboral, social e económica, vexa con inquedaanza como os seus piares fundamentais se abrandan co devenir duns tempos pouco proclives cara ela.

Xa que logo, compre dar unha axeitada resposta legislativa para proporcionar un marco normativo ó sector pesqueiro, marisqueiro e acuícola que lle permita recuperar a ilusión polo mar e superar as súas inquedaanzas, así como para manter o papel relevante de Galicia neste eido. Por iso, faise necesario abordar a modificación da Lei 11/2008, do 3 de decembro, de pesca de Galicia, coa pretensión de que sexa un instrumento axeitado á realidade do sector da nosa Comunidade Autónoma, con maior claridade e amplitude de contidos que eviten a vaguidade e a imprecisión nalgúns ámbitos de regulación.

Así, mediante esta modificación, introdúcese no seu articulado melloras técnicas nas medidas de xestión e conservación, e nas de protección e rexeneración dos recursos, como as áreas de repoboación mariñas e as reservas mariñas, e se regula a inmersión, traslado e solta de especies.

No ámbito da pesca marítima profesional e do marisqueo contéplase de novo como título administrativo habilitante para o exercicio da actividade extractiva o permiso de explotación, figura xurídica xa consolidada dentro do propio sector desde que foi introducida pola Lei 6/1993, do 15 de maio, de pesca de Galicia, e que permitiu poñer en práctica unha xestión adecuada dos recursos e unha distribución ordeada dos medios humanos e materiais que operan na actividade pesqueira e marisqueira. Tales motivos esixen manter esta figura en detrimento da licenza e do permiso especial de pesca que contemplaba a Lei 11/2008. Como novidade máis salientable, cabe reseñar que, coa finalidade de lograr unha maior simplificación administrativa, o permiso de explotación para a pesca profesional terá validez durante a vida útil da embarcación, sempre que ésta reúna as condicións que se establezan sobre navegabilidade e seguridade.

No referente á pesca marítima de recreo, complétase o seu réxime xurídico regulando as artes e as especies que se poden capturar. Concrétanse tamén, en aras dunha maior seguridade xurídica, as medidas específicas de ordenación que se poderán aplicar á pesca recreativa.

No ámbito da acuicultura, na procura tamén dunha maior simplificación administrativa, suprímese o requisito de dispoñer dun título administrativo habilitante para a instalación dos establecementos auxiliares, ó ter que estar xa amparada por outros permisos, autorizacións e licencias, estimándose suficiente a regulación e control posterior da súa actividade por parte da consellería competente en materia de acuicultura nos aspectos por ésta regulados. Polo que se refire á acuicultura mariña, mantense o

concurso como regra xeral para o outorgamento das concesións de actividade na zona marítima, se ben, no suposto de extinción por vencemento do prazo, incorpórase un novo procedemento para outorgar a nova concesión, máis áxil e sinxelo, tamén presidido polos principios de obxectividade, publicidade e concorrencia. Así mesmo, tendo en conta a situación económica e financeira do sector, os períodos de amortización das actuais concesións así como a necesidade de que Galicia recupere o liderazgo nesta actividade, dase unha nova redacción á disposición transitoria cuarta para modificar o inicio do cómputo do período de vencemento das concesións de actividade existentes na zona marítima, para contribuir deste xeito a mellorar a competitividade dun sector estratéxico na nosa economía.

Respecto da frota pesqueira galega, plásmase na Lei a obriga da Administración da Comunidade Autónoma de Galicia de levar a cabo a súa defensa cando faene en augas que non sexan da súa competencia co fin de manter a súa actividade e o seu nivel de emprego. Ordéase tamén con claridade as actuacións de modernización e reconversión, e se contemplan as medidas de adecuación da frota ó estado dos recursos.

Introdúcese tamén un precepto adicado ó Comité Científico Galego da Pesca como órgano de consulta e de asesoramento científico e técnico da Xunta de Galicia nos asuntos relacionados coa xestión dos recursos mariños.

En relación coa transformación, defínense as empresas de transformación dos produtos da pesca, do marisqueo e da acuicultura, e establécese unha tipoloxía de establecementos a ela dedicados.

En canto á investigación, desenvolvemento tecnolóxico e innovación, recóllense as súas definicións así como os mecanismos de coordinación de actuacións nesta materia.

Un dos eixes fundamentais desta modificación consiste en manter e non derogar o réxime xurídico regulador das confrarías de pescadores, do Servizo de Gardacostas de Galicia e do Instituto Tecnolóxico para o Control do Medio Mariño de Galicia existente con anterioridade á promulgación da Lei 11/2008, do 3 de decembro. Respecto ás confrarías de pescadores, a súa relevancia, a súa organización, así como a súa eficacia e eficiencia demostradas, son razóns suficientes para manter o seu réxime xurídico diferenciado, complementario e coordinado, en todo caso, co establecido na presente Lei.

Respecto do Servizo de Gardacostas de Galicia e do Instituto Tecnolóxico para o Control do Medio Mariño de Galicia, a substitución do primeiro polo Servizo de Inspección e Vixilancia Pesqueira, e a extinción do segundo como ente de dereito público esixirían unha nova reorganización da Administración marítimo-pesqueira, coa creación de novas unidades administrativas, o que conculcaría ós criterios de eficacia, austeridade e economía que deben inspirar a actuación e organización administrativa.

Neste mesmo senso, dacordo cos criterios sinalados, procécese a suprimir a Axencia de Desenvolvemento Sustentable das Zonas de Pesca, prevista na Lei e aínda non desenvolvida, en tanto que os seus fins poden ser acadados mediante a estrutura da consellería competente en materia marítima e pesqueira, coordinando de forma directa e efectiva os seus propios recursos e as medidas e accións a desenvolver nas poboacións costeiras.

Por último, en concordancia coas modificacións sinaladas e coa nova organización da Administración periférica da Comunidade Autónoma de Galicia, modifícanse tamén determinados preceptos do réxime sancionador.

**Artigo único.** Modificación da Lei 11/2008, do 3 de decembro, de pesca de Galicia.

A Lei 11/2008, do 3 de decembro, de pesca de Galicia, modifícase nos seguintes termos:

Uno. Engádesse un apartado 23 ó artigo 4 coa seguinte redacción:

“23.Subsector: parte da economía que inclúe todas ou parte das actividades de extracción, cultivo, produción, manipulación, transformación ou comercialización dun grupo determinado de produtos da pesca, do marisqueo ou da acuicultura.”

Dous. O artigo 5 queda redactado do seguinte modo:

“Artigo 5. *Preferencia da organizacións de produtores de base.*

As autorizacións e as concesións outorgaráselles con carácter preferente aos produtores de base ou ás organizacións de produtores de base, en calquera das súas formas asociativas, que veñan sendo titulares das mesmas e que acrediten experiencia na súa explotación.”

Tres. O apartado 1 do artigo 6 queda redactado do seguinte modo:

“1. O establecemento e a regulación de medidas dirixidas á conservación, a xestión e a explotación responsable, racional e sustentable dos recursos mariños vivos. A adopción de medidas restrictivas orientadas á recuperación dos recursos farase de xeito gradual, procurando minimiza-los posibles desequilibrios socio-económicos que se puidesen derivar da súa adopción.”

Catro. As letras a) e b) do apartado 2 do artigo 7 quedan redactadas do seguinte modo:

“a) Plans de xestión anuais ou plurianuais para as especies que se atopen dentro dos límites biolóxicos de seguranza. Estes plans, que poderán ser elaborados por iniciativa das entidades asociativas do sector, poderán incluír limitacións de capturas, capacidade e esforzo pesqueiro, medidas técnicas e doutra clase adaptadas ás circunstancias.

b) Plans de recuperación de carácter plurianual, para as especies fóra dos límites biolóxicos de seguranza. Nos plans de recuperación fíxaranse medidas, prazos e obxectivos para garantir a recuperación das poboacións.”

Cinco. A letra e) do apartado 2 do artigo 7 queda redactada do seguinte modo:

“e) Plans experimentais para novas especies, novas artes, modificación das existentes, novas zonas ou novas medidas de xestión.”

Seis. A letra i) do apartado 2 do artigo 7 queda sen contido.

Sete. O artigo 8 queda redactado do seguinte modo:

“Artigo 8. *Clasificación das zonas de produción.*

A consellería competente en materia de pesca clasificará as zonas de produción de moluscos bivalvos e doutros organismos procedentes da pesca, do marisqueo e da acuicultura en función da calidade das augas e dos organismos mariños, dacordo coa normativa estatal e comunitaria ao respecto.”

Oito. O artigo 11 queda redactado do seguinte modo:

“Artigo 11. *Áreas de repoboación mariña.*

1. Co fin de conservar, favorecer a rexeneración ou incrementar as especies poderanse declarar áreas de repoboación mariña para realizar liberacións controladas de especies en calquera fase do seu ciclo vital.

A declaración de área de repoboación mariña requirirá previamente a realización daqueles estudos e informes de carácter científico que garantan a súa idoneidade.

Nestas áreas estableceranse normas especiais para o exercicio da actividade pesqueira, así como de todas aquelas actividades que poidan afectar a efectividade desta medida rexeneradora.

2. Esta repoboación será realizada directamente pola Administración da Comunidade Autónoma de Galicia nas zonas e condicións regulamentariamente determinadas.

3. Excepcionalmente, poderán realizar as repoboacións entidades públicas ou privadas, previa autorización da consellería competente en materia de pesca ou en virtude de convenio asinado ao efecto.”

Nove. Engádese un artigo 11 bis coa seguinte redacción:

“Artigo 11 bis. *Inmersión, traslado e solta de especies.*

A inmersión e solta de gametos, larvas, ovos, xuvenís e adultos de calquera especie nas augas, instalacións e territorio competencia da Comunidade Autónoma galega, requirirá da correspondente autorización da consellería competente en materia de pesca, e sempre que reúnan os requisitos e condicións que regulamentariamente se determinen, de conformidade coa normativa vixente, con independencia da súa orixe.

Non se permitira a inmersión de gametos, larvas, ovos, xuvenís e adultos de calquera especie que entrañen un risco ecolóxico e sanitario para as augas e territorio competencia da Comunidade Autónoma galega.”



Dez. O artigo 12 queda redactado do seguinte modo:

“Artigo 12. *Reservas mariñas.*

1. Considéranse reservas mariñas aquelas zonas de especial interese para a preservación e a rexeneración dos recursos mariños e dos ecosistemas mariños que os sustentan, que presentan condicións diferenciadas para o crecemento e permanencia dos recursos pesqueiros pola súa condición de áreas de reprodución, desova, cría ou engorda de especies de interese pesqueiro ou marisqueiro

2. Na norma de declaración se determinará como mínimo a delimitación xeográfica da zona de reserva e as restriccións ou prohibicións no exercicio da actividade pesqueira ou marisqueira ou calquera outra que afecten directamente a finalidade pretendida coa declaración.

3. Nas augas interiores dos espazos naturais protexidos, as limitacións ou prohibicións da actividade pesqueira fixaranse pola consellería competente en materia de pesca de conformidade coa lexislación que sexa de aplicación.

4. Nas augas exteriores dos espazos naturais protexidos, as limitacións ou prohibicións da actividade marisqueira e acuícola fixaranse pola consellería competente en materia de marisqueo e acuicultura de conformidade coa lexislación que sexa de aplicación.”

Once. O apartado 2 do artigo 15 queda redactado do seguinte modo:

“2. A regulación das condicións do exercicio da pesca marítima profesional.”

Doce. O artigo 16 queda redactado do seguinte modo:

“Artigo 16. *Buques de pesca autorizados.*

Para o exercicio da pesca profesional soamente se poderán empregar embarcacións incluídas no Censo da frota pesqueira operativa e no Rexistro de buques pesqueiros de Galicia.”

Trece. O artigo 17 queda sen contido.

Catorce. O artigo 18 queda redactado do seguinte modo:

“Artigo 18. *Permiso de explotación para a pesca profesional.*

1. O exercicio da pesca marítima profesional requerirá estar en posesión dun permiso de explotación, sen prexuízo do disposto na normativa vixente para o exercicio da pesca en augas exteriores.
2. O permiso de explotación será intransferible a terceiros, salvo que se faga conxuntamente coa transferencia do buque e logo da

conformidade da consellería competente en materias de pesca. Non obstante, poderase transferir o permiso de explotación a un novo buque sempre que substitúa ó anterior.

3. O permiso de explotación será outorgada pola consellería competente en materia de pesca. Terá validez durante a vida útil do buque sempre que reúna as condicións establecidas para a navegabilidade, frotabilidade e seguridade marítima e laboral.

4. A modificación ou modernización dos elementos propios do buque ou a variación dos datos que constan no permiso de explotación implicará a solicitude dun novo permiso nas condicións e nos prazos que se determinen regulamentariamente, sen prexuízo da emisión dos informes e das autorizacións que se establezan.

5. No suposto da transmisión da titularidade do buque, sempre que éste manteña como base un porto da Comunidade Autónoma de Galicia, sera preceptiva a previa autorización da consellería competente en materia de pesca.”

Quince. Engádese un artigo 18 bis coa seguinte redacción:

“Artigo 18 bis. *Expedición do permiso de explotación.*

Os permisos de explotación para a pesca profesional serán expedidos especificamente para artes ou zonas determinadas. Poderán ser estacionalmente alternantes e non se autorizará o uso de dúas artes simultaneamente. En función do estado dos recursos, poderán outorgarse cambios nas artes ou zonas incluídos nos permisos de explotación atendendo ós criterios de obxectividade, equidade e transparencia.”

Dezaseis. Engádesse un artigo 18 ter coa seguinte redacción:

“Artigo 18 ter. *Obrigas dos titulares dos permisos de explotación.*

Os titulares dos permisos de explotación deberán cumprir, como mínimo, as seguintes obrigas:

- a) Respetar a lexislación vixente en materia de tamaños mínimos, topes de capturas, vedas, especies e artes.
- b) Exercer a actividade única e exclusivamente naquelas zonas para as que está autorizado.
- c) Facilitar a Administración da Comunidade Autónoma de Galicia os datos sobre as capturas, descargas e vendas realizadas.”

Dezasete. O artigo 21 queda redactado do seguinte modo:

“Artigo 21. *Cambio temporal de modalidade.*

A consellería competente en materia de pesca poderalles autorizar temporalmente ós buques cambio de modalidade distinta da establecida no permiso de explotación en función do estado dos recursos.”

Dezaioito. O artigo 22 queda redactado do seguinte modo:

“Artigo 22. *Definición.*

A pesca marítima de recreo é aquela que se practica por entretenemento, deporte ou afección, sen ánimo de lucro, en perfecta harmonía e respecto co exercicio da actividade pesqueira, marisqueira e acuícola profesional.”

Dezanove. A letra c) do artigo 23 queda redactada do seguinte modo:

“c) Pesca submarina, que se realizará nadando ou mergullando a pulmón libre.”

Vinte. Engádese un artigo 23 bis coa seguinte redacción:

“Artigo 23 bis. *Artes*

1. No exercicio da pesca marítima de recreo, xa sexa desde terra ou desde embarcación, únicamente se poderán empregar aparellos de anzol, sostidos pola man ou a cana.

2. Na práctica da pesca submarina únicamente se poderán empregar arpóns, frechas ou físgas impulsadas pola man ou por medios mecánicos, quedando expresamente prohibido o emprego de equipos autónomos o semiautónomos de mergullo, así como a utilización de artefactos hidrodesslizadores ou similares. Nas embarcacións non se poderán levar a bordo simultaneamente arpóns de pesca e calquera dos

equipos de mergullo anteriormente mencionados.

3. No exercicio da pesca marítima de recreo queda expresamente prohibida:

a) A utilización de artes, aparellos e útiles distintos dos expresamente permitidos nos apartados anteriores.

b) A utilización de sustancias tóxicas, narcóticas, venenosas, detonantes, explosivas, corrosivas ou que contaminen o medio mariño.

c) O emprego de luces e equipos eléctricos que sirvan de atracción para a pesca.”

Vinte e un. Engádesse un artigo 23 ter coa seguinte redacción:

“Artigo 23 ter. *Especies.*

1. No exercicio da pesca marítima de recreo só se poderán capturar peixes e cefalópodos.

2. As especies capturadas no exercicio da actividade pesqueira de recreo non poderán, en ningún caso, ser obxecto de venda ou comercialización directa ou indirecta.”

Vinte e dous. Engádesse un artigo 23 quater coa seguinte redacción:

“Artículo 23 quáter. *Prohibicións.*

No exercicio da pesca marítima de recreo queda expresamente

prohibido:

- a) A captura, tenencia e desembarque de especies prohibidas, vedadas ou de tamaño ou peso inferior ao establecido regulamentariamente, debendo ser devoltas inmediatamente ao mar en caso de captura accidental.
- b) O exercicio da pesca recreativa submarina nas reservas mariñas así como nos canais navegables e de acceso aos portos ata unha distancia que fixará a consellería competente en materia de pesca.
- c) O exercicio da pesca recreativa submarina desde o solpor ata o amencer.
- d) Obstaculizar ou interferir as faenas de pesca marítima profesional, marisqueira ou acuícola.”

Vinte e tres. O artigo 26 queda redactado do seguinte modo:

“Artigo 26. *Medidas de ordenación.*

1. Seranlle aplicables á pesca marítima de recreo as medidas de protección e conservación dos recursos pesqueiros establecidos para a pesca marítima profesional.
2. Malia o anterior, a consellaría competente en materia de pesca poderá establecer medidas específicas para a pesca recreativa por razón da protección e conservación dos recursos pesqueiros, co fin de que esta non interfira ou prexudique a actividade pesqueira profesional.

3. Estas medidas poderán consistir, entre outras, en:

a) O establecemento de vedas temporais ou zonais.

b) A prohibición de métodos, artes ou instrumentos de pesca.

c) A determinación de tempos máximos de pesca.

d) A fixación do volume máximo de capturas por persoa, barco, día e especie ou grupos de especies, así como de tallas ou pesos mínimos, non podendo ser os mesmos inferiores aos establecidos para a pesca profesional.

e) A delimitación de zonas para a práctica da pesca recreativa submarina.”

Vinte e catro. O apartado 4 do artigo 32 queda redactado do seguinte modo:

“4. A consellaría competente promoverá o acceso á titularidade de autorizacións e concesións das organizacións de produtores de base integradas maioritariamente por mulleres.”

Vinte e cinco. O apartado 1 do artigo 33 queda redactado do seguinte modo:

“1. As autorizacións outorgaráselles preferentemente ás organizacións de produtores de base.”



Vinte e seis. O artigo 39 queda redactado do seguinte modo:

“Artigo 39. *Habilitación para o exercicio do marisqueo.*

1. O exercicio do marisqueo en zonas de autorización marisqueira ou de libre marisqueo requirirá estar en posesión:

- a) Do permiso de explotación para o marisqueo a pé.
- b) Da modalidade de marisqueo no permiso de explotación da embarcación.

2. A Xunta de Galicia, por proposta da consellaría competente en materia de marisqueo, establecerá os requisitos para a obtención, a renovación, a perda ou a suspensión das habilitacións para o exercicio do marisqueo recollidas no apartado anterior.

3. As condicións para a utilización de embarcacións da lista cuarta no exercicio do marisqueo serán establecidas regulamentariamente.”

Vinte e sete. O artigo 40 queda redactado do seguinte modo:

“Artigo 40. *Permiso de explotación para o marisqueo a pé.*

1. O permiso de explotación para o marisqueo a pé será expedido a nome dunha persoa física a título individual e intransferible. Para a súa obtención requirirase ter a cualificación profesional correspondente.

2. Outorgarase por un período de un ano, e renovarase anualmente.
3. O permiso conterá, como mínimo, a seguinte información:
  - a) O nome da persoa titular e o DNI.
  - b) As zonas e as especies autorizadas.
  - c) Calquera outra información relativa á actividade.
  - d) A validez do permiso.”

Vinte e oito. O artigo 41 queda redactado do seguinte modo:

“Artigo 41. *Exercicio do marisqueo desde embarcación.*

O exercicio do marisqueo desde embarcación requerirá dispoñer da modalidade de marisqueo no permiso de explotación da embarcación contemplado no artigo 18 da presente Lei.”

Vinte e nove. O apartado 1 do artigo 42 queda redactado do seguinte modo:

“1. A explotación das distintas especies de recursos específicos realizarase por modalidades. Requerirá estar en posesión das correspondentes habilitacións contempladas no artigo 39 da presente Lei e participar nun plan de xestión.”

Trinta. O apartado 2 do artigo 43 queda redactado do seguinte modo:

“2. A recollida de argazos non require título administrativo habilitante, polo que se poden recoller na forma e nas condicións que regulamentariamente se determinen.”

Trinta e un. O artigo 45 queda redactado do seguinte modo:

“Artigo 45. *Obxectivo.*

O obxectivo da acuicultura mariña será acadar o óptimo aproveitamento do potencial produtivo do medio mariño, respectando o medio ambiente e aumentando e promovendo a competitividade, así como a mellora das condicións de vida e traballo das persoas que se dedican a esta actividade e a contribución ao desenvolvemento socioeconómico das comunidades costeiras.”

Trinta e dous. O artigo 47 queda redactado do seguinte modo:

“Artigo 47. *Títulos administrativos habilitantes.*

1. O exercicio por toda persoa física ou xurídica da actividade de cultivos mariños require un título administrativo habilitante previo outorgado pola consellaría competente en materia de acuicultura, sen prexuízo dos permisos, das licenzas e das autorizacións que lles corresponda outorgar a outros organismos no exercicio das súas competencias.

2. Para os efectos desta lei, considéranse títulos administrativos habilitantes aqueles que se lles outorgan ás persoas físicas ou xurídicas para a instalación, a posta en funcionamento e a explotación dos establecementos de cultivos mariños.

3. Os títulos administrativos que habilitan para o exercicio da acuicultura adoptarán algunha das seguintes modalidades:

- a) Concesión de actividade.
- b) Permiso de actividade.

4. Os establecementos de cultivos mariños que precisen ocupar para a súa instalación, posta en funcionamento e explotación terreos de dominio público marítimo ou marítimo-terrestre precisarán da concesión de actividade que outorgará a consellaría competente en materia de acuicultura, de conformidade co procedemento que regulamentariamente se estableza, logo de informe preceptivo e vinculante da Administración do Estado sobre a ocupación do dominio público.

5. Os establecementos de cultivos mariños en zona terrestre requirirán o permiso de actividade en todo caso.”

Trinta e tres. O parágrafo c) do apartado 3 do artigo 52 queda redactado do seguinte modo, e engádesen os parágrafos e), f), g) e h) coa seguinte redacción:

“c) A experiencia no desenvolvemento de actividades de acuicultura na zona marítimo-terrestre”.

“e) A utilización de novas tecnoloxías.

f) A menor afección ó medio ambiente.

g) A xeneración de emprego e, en especial, a contratación de profesionais do mar.

h) A utilización de semente, crías ou especies autóctonas, así como daquelas especies declaradas preferentes pola Administración da Comunidade Autónoma de Galicia.”

Trinta e catro. Engádese un apartado 4 ó artigo 52 coa seguinte redacción:

“4. No outorgamento dos títulos administrativos habilitantes terase en conta os dereitos doutras persoas que de forma regular e regulamentariamente viñesen explotando a zona.”

Trinta e cinco. O apartado 1 do artigo 54 queda redactado do seguinte modo:

“1. Os establecementos amparados pola concesión poderán ser alleados ou cedidos conxuntamente con esta en calquera momento do período de vixencia dela, sendo necesarias para a súa transmisión ou cesión a autorización previa da consellaría competente en materia de acuicultura e mais a comprobación de que a nova persoa titular cumpre os requisitos contidos nesta lei. Esixirase, en todo caso, que esa cesión ou transmisión se realice mediante escritura pública.”

Trinta e seis. Engádase un último parágrafo ó artigo 56 coa seguinte redacción:

“Os produtos obtidos no desenvolvemento dos proxectos experimentais poderán ser comercializados previa autorización expresa da consellería competente en materia de acuicultura, sempre que cumpran os requirimentos establecidos na normativa sobre calidade e seguridade alimentaria de aplicación.”

Trinta e sete. Engádase un apartado 3 ó artigo 60 coa seguinte redacción:

“3. Na zona marítima non se permitirá outro tipo de instalacións que as imprescindibles para o funcionamento da explotación.”

Trinta e oito. Os apartado 1, 2 e 3 do artigo 62 quedan redactados do seguinte modo:

“1. Os procedementos de outorgamento das concesións de actividade estarán presididos polos principios de obxectividade, equidade, publicidade, concorrencia e transparencia.

2. A consellaría competente en materia de acuicultura, logo do informe das organizacións representativas do correspondente subsector da acuicultura mariña, convocará concurso público para o outorgamento das concesións de actividade conforme ó previsto nos seguintes apartados.

3. A excepción do sinalado no artigo 62 bis, nos supostos de extinción de concesións de actividade a consellería competente en materia de acuicultura convocará o concurso público para a mesma especie de cultivo que tiña por obxecto a concesión extinta.”

Trinta e nove. Engádese un artigo 62 bis coa seguinte redacción:

*“Artigo 62 bis. Outorgamento da concesión no suposto de extinción por vencemento do prazo.*

1. No suposto da extinción dunha concesión por vencemento do prazo de vixencia, o procedemento para o outorgamento da nova concesión de actividade iniciarase mediante a presentación ante a consellería competente en materia de acuicultura da correspondente solicitude, acompañada dun proxecto relativo á instalación e explotación do establecemento de cultivos mariños que se pretenda.

2. Admitida a trámite a solicitude, a consellería competente en materia de acuicultura abrirá un período de información pública por un prazo dun mes, con indicación do nome do solicitante, clase de establecemento e ubicación.

3. Practicada a fase de información, a consellería resolverá sobre a solicitude, previa audiencia dos interesados e interesadas no expediente.

4. No caso de que se decida outorgar a concesión de actividade, a consellería ofertará ao solicitante as condicións en que se outorgaría aquela, dándolle un prazo de quince días para que manifieste se as acepta. Transcorrido tal prazo sen realizar manifestación algunha, ou

non aceptadas as condicións ofertadas, declararase finalizado o procedemento por desestimento do petionario ou petionaria.

5. No caso de aceptar as condicións no prazo estipulado, a consellería competente en materia de acuicultura resolverá discrecionalmente sobre o outorgamento da concesión no prazo dun año a partir da iniciación do procedemento. Transcorrido o mencionado prazo sen que fose dictada e notificada a resolución, entenderase denegada a mesma.”

Corenta. Engádase un último parágrafo ó artigo 65 coa seguinte redacción:

“Os produtos obtidos no desenvolvemento dos proxectos experimentais poderán ser comercializados previa autorización expresa da consellería competente en materia de acuicultura, sempre que cumpran os requirimentos establecidos na normativa sobre calidade e seguridade alimentaria de aplicación.”

Corenta e un.O apartado 2 do artigo 66 queda redactado do seguinte modo:

“2. Os establecementos de acuicultura situados na zona terrestre e en propiedades privadas requirirán o oportuno permiso de actividade, sen prexuízo dos demais permisos, licencias e autorizacións que lles corresponda outorgar a outros organismos no exercicio das súas competencias.”



Corenta e dous. A letra a) do artigo 68 queda redactada do seguinte modo:

“a) Manter en bo estado as obras e as instalacións que compón o establecemento de cultivos mariños.”

Corenta e tres. O artigo 69 queda redactado do seguinte modo:

“Artigo 69. *Duración.*

Os permisos de actividade para o establecemento de cultivos mariños que se sitúen en terreos de titularidade privada terán carácter indefinido.”

Corenta e catro. A letra h) do apartado 1 do artigo 71 queda redactada do seguinte modo:

“h) Polo alugamento do establecemento de cultivos mariños a terceiras persoas.”

Corenta e cinco. O artigo 72 queda sen contido.

Corenta e seis. Engádense os apartados 9 e 10 ó artigo 74, coa seguinte redacción:

- “9. A garantía da protección medioambiental.
- 10. O fomento da frota artesanal.”

Corenta e sete. Engádesse un artigo 74 bis coa seguinte redacción:

“Artigo 74 bis. *Frota pesqueira galega noutras augas.*

A Administración da Comunidade Autónoma de Galicia defenderá nos foros pertinentes e adoptará cantas medidas sexan precisas para garantir a permanencia e o acceso das embarcacións galegas nos caladoiros cuxa regulación non sexa da súa competencia, coa finalidade de consolidar a súa actividade pesqueira, a súa rendibilidade económica e o mantemento, na medida do posible, do nivel de emprego existente.”

Corenta e oito. O artigo 77 queda redactado do seguinte modo:

“Artigo 77. *Modernización e reconversión.*

1. Os efectos da presente lei enténdese por modernización e reconversión de embarcacións a modificación das condicións técnicas do buque mediante as obras e a incorporación de novas instalacións, maquinaria ou equipos que incidan na súa capacidade de pesca ou nas súas condicións de seguranza, e en particular as seguintes:

- a) As obras que impliquen variación das dimensións da embarcación.
- b) Os cambios do motor propulsor.
- c) As obras que impliquen variación da capacidade de almacenamento, conservación e transformación a bordo dos produtos da pesca, do marisqueo ou da acuicultura.
- d) A incorporación de instalacións e equipos que modifiquen a capacidade extractiva.
- e) As obras e melloras na embarcación dirixidas ao cambio da modalidade de pesca.
- f) As obras e equipamentos destinados ó incremento das condicións de seguranza e navegabilidade.

2. Correspóndelle á consellaría competente en materia de pesca a autorización das obras de modernización e reconversión dos buques de pesca con porto base en Galicia e nas condicións que regulamentariamente se determinen conforme a normativa vixente.”

Corenta e nove. Engádesse un artigo 77 bis coa seguinte redacción:

“Artigo 77 bis. *Adecuación da frota ó estado dos recursos.*

1. Correspóndelle á consellería competente en materia de pesca autorizar as accións encaminadas á adecuación das distintas frotas ós recursos dispoñibles, e propiciar a recuperación e o mellor aproveitamento dos mesmos, previa consulta ós axentes sociais, conforme ó establecido na normativa estatal e comunitaria.

2. Estas accións poderán levarse a cabo mediante medidas de paralización definitiva da frota, o que implicará o cese permanente da actividade, ou mediante paralizacións temporais ou estacionarias.”

Cincuenta. O título VII pasa a denominarse “Dos axentes do sector pesqueiro e dos órganos asesores en materia de pesca”.

Cincuenta e un. O artigo 79 queda redactado do seguinte modo:

“Artigo 79. *As confrarías de pescadores.*

1. As confrarías de pescadores son corporacións de dereito público, sen ánimo de lucro, dotadas con personalidade xurídica e capacidade de obrar para o cumprimento dos seus fins.

2. As confrarías actúan como órganos de consulta e colaboración da Administración da Comunidade Autónoma de Galicia en materias relativas á actividade extractiva e ordenación do sector pesqueiro.

3. As confrarías de pescadores rexeranse pola súa lexislación específica.”

Cincuenta e dous. Os artigos 80 a 88 quedan sen contido.

Cincuenta e tres. Engádesse un artigo 95 bis coa seguinte redacción:

“Artigo 95 bis. *Comité Científico Galego da Pesca.*

1. O Comité Científico Galego da Pesca é un órgano colexiado, de consulta e de asesoramento científico e técnico da Xunta de Galicia nos asuntos relacionados coa xestión dos recursos naturais vivos das augas competencia da Comunidade Autónoma de Galicia.

2. As súas funcións son, entre outras, as seguintes:

a) Elaborar un informe anual sobre o estado dos recursos obxecto de interese para a frota galega.

b) Elaborar informes e ditames sobre o estado dos recursos obxecto da actividade pesqueira e sobre as medidas de conservación que hai que adoptar.

c) Avaliar cientificamente as medidas de xestión dos recursos mariños que sexan sometidas á súa consideración.

d) Asesorar cientificamente ós órganos superiores e directivos da consellería competente en materia de pesca naqueles asuntos que se lle propoñan.

e) Asesorar sobre as áreas prioritarias de investigación mariña que deban acometerse en cada momento.

3. Regulamentariamente desenvolveranse a súa composición, as súas funcións e o seu réxime de funcionamento.”

Cincuenta e catro. Engádese un artigo 104 bis coa seguinte redacción:

“Artigo 104 bis. *As empresas de transformación.*

Os efectos da presente lei considéranse empresas de transformación dos produtos da pesca, do marisqueo e da acuicultura aquelas que no seu proceso de comercialización manipulen, conserven ou transformen estes produtos para o consumo humano ou animal, tendo como principal compoñente a materia prima procedente dos recursos vivos citados.”

Cincuenta e cinco. Engádese un artigo 104 ter coa seguinte redacción:

“Artigo 104 ter. *Tipos de establecementos*

Considéranse como establecementos de transformación os seguintes:

- a) As instalacións destinadas para o descabezado, eviscerado, esfolado, torado, salga, secado, afumado, así como o escabechado, a coción e o enlatado ou outras formas de envasado e preparación dos produtos.
- b) As instalacións de almacenamento, de almacenamento refrixerado e de refrixerado.
- c) As instalacións destinadas ó embalaxe e presentación dos produtos.
- d) Os recintos e equipamentos con innovacións tecnolóxicas aplicadas a novos produtos ou ós actuais.

e) As instalacións que se adiquen á mellora da calidade e a hixiene das condicións de produción ou manipulación.

f) En xeral, todos os recintos e/ou locais cos equipos necesarios para a manipulación, transformación, conservación e almacenamento dos produtos da pesca, do marisqueo e da acuicultura, desde o inicio da súa produción e primeira venda ata a fase do produto final.”

Cincuenta e seis. O capítulo I do título IX queda sen contido.

Cincuenta e sete. Engádesse un artigo 114 bis coa seguinte redacción:

“Artigo 114 bis. *Definicións.*

Ós efectos da presente lei, enténdese por investigación pesqueira e oceanográfica aquela que permite coñecer en cada momento a situación dos recursos pesqueiros, marisqueiros e da acuicultura, así como as condicións do medio mariño co fin de planificar, dimensionar e estruturar o sector no exercicio dunha pesca sustentable.

Así mesmo, enténdese por desenvolvemento tecnolóxico e innovación a adopción de novos métodos e técnicas de produción, transformación e comercialización, así como a modernización das estruturas e industrias.”

Cincuenta e oito. Engádesse un artigo 115 bis coa seguinte redacción:

“Artigo 115 bis. *Coordinación das actuacións de investigación e de desenvolvemento tecnolóxico.*

1. A consellería competente en materia de pesca, no marco das súas competencias, establecerá as medidas necesarias para lograr un sistema coordinado, homoxéneo e eficaz de investigación e desenvolvemento tecnolóxico, contemplando, alomenos, os aspectos seguintes:

a) A determinación dos fins e obxectivos mínimos comunes en materia de investigación, desenvolvemento e innovación, así como o establecemento de criterios básicos e comúns de avaliación da eficacia dos programas estratéxicos e liñas prioritarias aprobadas.

b) A coordinación do desenvolvemento de programas de investigación aplicada e tecnoloxía e da asignación ós mesmos de recursos públicos de calquera procedencia, ós efectos de conseguir a máxima produtividade das inversións, no ámbito da Comunidade Autónoma de Galicia.

2. Os programas de investigación aplicada e tecnoloxía no ámbito da pesca, do marisqueo e da acuicultura a desenvolver tanto en augas como en materias competencia da Comunidade Autónoma de Galicia, solicitados polas distintas Administracións públicas, organizacións do sector ou empresas requirirán, previamente a súa aprobación, o informe preceptivo da consellería competente en materia de pesca.

3. A consellería competente en materia de pesca participará na elaboración de plans e programas que sobre investigación, desenvolvemento e innovación tecnolóxica dos recursos pesqueiros, marisqueiros e acuícolas e os seus produtos, maquinarias e demais instrumental preciso para o desenvolvemento das actividades reguladas na presente lei, emanen das políticas xerais de investigación científica e xestión dos recursos pesqueiros, marisqueiros e acuícolas.”



Cincuenta e nove. Os artigos 120, 121 e 122 quedan sen contido.

Sesenta. Engádese un artigo 123 bis coa seguinte redacción:

“ Artigo 123 bis. *Colaboración na vixilancia.*

Os gardapescas marítimos, debidamente habilitados conforme a súa normativa específica, poderán prestar a súa colaboración ó Servizo de Gardacostas de Galicia no exercicio das súas funcións, coa finalidade de potenciar as actividades de inspección e vixilancia pesqueira, marisqueira e acuícola atribuídas ó referido Servizo.”

Sesenta e un. O parágrafo 1 do apartado B) do artigo 136 queda redactado do seguinte modo:

“1. Non levar consigo ou non exhibir o título administrativo habilitante ou a documentación que se estableza regulamentariamente sobre a actividade pesqueira ou marisqueira.”

Sesenta e dous. O parágrafo 2 do apartado B) do artigo 137 queda redactado do seguinte modo:

“2. O exercicio da actividade extractiva sen o título administrativo habilitante.”

Sesenta e tres. O parágrafo 9 do apartado B) do artigo 137 queda redactado do seguinte modo:

“9. A obtención dos títulos administrativos habilitantes con base en documentos, datos ou informes falsos.”

Sesenta e catro. O parágrafo 13 do apartado B) do artigo 137 queda redactado do seguinte modo:

“13. A captura de especies ovadas ou de talla ou peso inferior ao establecido, segundo os límites e as condicións que se fixen regulamentariamente.”

Sesenta e cinco. Os parágrafos 18, 19 e 20 do apartado B) do artigo 137 quedan redactados do seguinte modo:

“18. A posesión na embarcación de artes de pesca en maior número do autorizado regulamentariamente, así como a súa utilización sen ningún tipo de identificación.

19. O uso ou a tenza a bordo de artes, aparellos ou útiles de pesca ou marisqueo distintos dos autorizados no título administrativo habilitante, ou non anotar a devandita actividade na forma que regulamentariamente se estableza, agás casos puntualmente autorizados.

20. A alteración dos datos ou das circunstancias que figuren no correspondente título administrativo habilitante.”

Sesenta e seis. Os apartados 1 e 2 e a letra a) do apartado 3 do artigo 153 quedan redactados do seguinte modo:

“1. A competencia para acordar a iniciación do procedemento sancionador corresponderalle ó xefe ou xefa territorial do departamento territorial da consellería competente en materia de pesca.

2. Será competente para a instrución do procedemento o funcionario ou a funcionaria designada polo xefe ou xefa territorial do departamento territorial.”

“a) Ós xefes ou xefas territoriais do departamento territorial do ámbito no que se cometese a infracción, nos casos de infraccións sancionadas con multas de contía inferior a 15.000 euros.”

Sesenta e sete. O apartado 1 do artigo 155 queda redactado do seguinte modo:

“1. As actas de inspección redactadas polo persoal funcionario do Servizo de Gardacostas de Galicia terán a condición de documento público e gozarán de eficacia probatoria respecto dos feitos nelas denunciados, sen prexuízo das probas que en defensa dos respectivos dereitos e intereses poidan sinalar ou achegar as persoas interesadas.”

Sesenta e oito. O apartado 4 do artigo 155 queda redactado do seguinte modo, e engádese o apartado 5 coa seguinte redacción:

“4. Cando no exercicio das súas funcións de asesoramento o persoal funcionario do Servizo de Gardacostas de Galicia detecte deficiencias ou simples inobservancias da normativa facilmente reparables, substituirá a acta á que se refire a alínea primeira deste artigo por unha acta de advertencia, na que, sen dar lugar á incoación dun procedemento sancionador, se farán constar:

- a) As deficiencias ou as inobservancias detectadas.
- b) As advertencias ou as medidas correctoras propostas e o prazo de reparación.”

“5. A resolución administrativa que, no seu caso, poña fin ó procedemento sancionador poderá ser solicitada, para o seu coñecemento, polo persoal funcionario do Servizo de Gardacostas de Galicia que redactase a acta de inspección que deu lugar a apertura do procedemento.”

Sesenta e nove. Os apartados 3 e 4 do artigo 156 quedan redactados do seguinte modo:

“3. As medidas cautelares poderaas adoptar, así que se inicie o procedemento sancionador, o xefe ou xefa territorial do departamento territorial da consellería competente en materia de pesca. Durante a súa tramitación, poderán ser alzadas ou modificadas en virtude de circunstancias sobrevidas ou que non puideron ser tidas en conta no momento da súa adopción.

4. Antes de se iniciar o procedemento, cando resulte preciso por razóns de urxencia ou de necesidade, o persoal funcionario do Servizo de Gardacostas de Galicia poderá adoptar verbalmente as medidas cautelares previstas na alínea 1, letras a) e b), deste artigo; proceder do que dará razón na correspondente acta. En defecto desta, deberase reflectir o oportuno acordo e a súa motivación por escrito coa maior brevidade posible, e en todo caso nun prazo non superior a cinco días, e daráselles traslado del ás persoas interesadas e ó departamento territorial. As medidas cautelares deberán ser confirmadas, modificadas ou levantadas no acordo de iniciación do procedemento, que se deberá efectuar dentro dos quince días seguintes á súa adopción.

En todo caso, as devanditas medidas cautelares quedarán sen efecto de non se iniciar o procedemento no devandito prazo ou cando o acordo de iniciación non conteña un pronunciamento expreso acerca delas.”

Setenta. O apartado 3 do artigo 157 queda redactado do seguinte modo:

“3. As artes, os aparellos, os útiles de pesca e marisqueo, os vehículos, as embarcacións, os equipos ou os outros accesorios regulamentarios incautados serán liberados logo da constitución de fianza, cuxa contía fixará o xefe ou xefa do departamento territorial da consellaría competente en materia de pesca, e aquela non poderá exceder do importe da sanción que poida corresponder pola infracción ou as infraccións cometidas.”

Setenta e un. A disposición adicional primeira queda sen contido.

Setenta e dous. A disposición adicional terceira queda redactada do seguinte modo:

*“Terceira. Infraccións cometidas no ámbito territorial da provincia de Ourense.*

Os procedementos sancionadores que se inicien por infraccións tipificadas nesta lei cometidas no ámbito territorial da provincia de Ourense tramitaranse no departamento territorial da consellería competente en materia de pesca con sede en Vigo.”

Setenta e tres. A disposición adicional quinta queda redactada do seguinte modo:

*“Quinta. Axentes da autoridade.*

Terán a condición de axentes da autoridade os funcionarios e as funcionarias doutras escalas, adscritos á consellaría competente en materia de pesca, que teñan atribuídas funcións de control do cumprimento da lexislación vixente en materia de seguranza alimentaria, sanidade animal e ambiente, atribuíndolles para o exercicio destas funcións o establecido nos artigos 3 e 4 da Lei 2/2004, do 21 de abril, pola que se crea o Servizo de Gardacostas de Galicia.”

Setenta e catro. As disposicións adicionais sexta e sétima quedan sen contido.

Setenta e cinco. A disposición adicional oitava queda redactada do seguinte modo:

*“Oitava. Do persoal funcionario da escala básica de vixilancia pesqueira, grupo D.*

O persoal funcionario do grupo D da escala básica de vixilancia pesqueira previsto na disposición transitoria segunda da Lei 2/2004, do 21 de abril, pola que se crea o Servizo de Gardacostas de Galicia, que á data da entrada en vigor desta lei aínda non optase á integración prevista na devandita disposición manterá o seu dereito a se integrar na escala de axentes do Servizo de Gardacostas, grupo C.1; este prazo para exercer tal dereito expira o 31 de decembro de 2011 e sempre que dentro do citado prazo acrediten estar en posesión da titulación requirida.

Así mesmo, e dentro do mesmo prazo, manterá o dereito a obter un posto de traballo reservado ao corpo auxiliar de Administración xeral da Xunta de Galicia, grupo D.”

Setenta e seis. As disposicións adicionais novena e décima quedan sen contido.

Setenta e sete. A disposición transitoria segunda queda sen contido.

Setenta e oito. A disposición transitoria cuarta queda redactada do seguinte modo:

*“Cuarta.-Concesións, autorizacións e permisos de actividade.*

Á entrada en vigor desta lei, as concesións, as autorizacións e os permisos de actividade seguirán vixentes nas condicións e nos prazos polos que foron concedidos ou autorizados.

Sen prexuízo do anterior, aos efectos do previsto do artigo 61 consideraránse como primeira concesión aquelas cuxa caducidade non fora declarada á entrada en vigor desta lei.”

Setenta e nove. A disposición transitoria quinta queda redactada do seguinte modo:

*“Quinta.Permisos de explotación.*

Á entrada en vigor desta lei, os permisos de explotación seguirán vixentes, nas condicións e nos prazos polos que foron outorgados.”

Oitenta. A disposición transitoria sexta queda sen contido.



Oitenta e un. Engádesse unha disposición transitoria oitava coa seguinte redacción:

*“Oitava. Comité Científico Galego da Pesca.*

Á entrada en vigor desta Lei, o Comité Científico Galego da Pesca permanecerá coas funcións e a composición que se determina na disposición regulamentaria vixente.”

Oitenta e dous. A disposición derogatoria única queda redactada do seguinte modo:

*“Única. Derrogación normativa.*

Quedan derogadas cantas disposicións de igual ou inferior rango se opoñan ao establecido nesta lei, e expresamente:

- a) A Lei 6/1993, do 11 de maio, de pesca de Galicia.
- b) A Lei 8/2004, do 30 de xullo, de protección, control, infraccións e sancións en materia marítimo-pesqueira de Galicia.”

**Disposición adicional única.** Vixencia de determinadas disposicións legais.

Á entrada en vigor da presente Lei decláranse expresamente vixentes as seguintes disposicións legais:

- a) A Lei 9/1993, do 8 de xullo, de confrarías de pescadores de Galicia.
- b) A Lei 2/2004, do 21 de abril, pola que se crea o Servizo de Gardacostas de Galicia.
- c) A Lei 3/2004, do 7 de xuño, de creación do Instituto Tecnolóxico para o Control do Medio Mariño de Galicia.

**Disposición derradeira única.** Entrada en vigor.

Esta lei entrará en vigor o mesmo día da súa publicación no Diario Oficial de Galicia.